

Inson tabiatining teran mushohadalari

Mutaxassislar Chexov hikoyalariga xos boʻlgan bir xususiyat – ularda voqelikka yondashishda rivoyat va latifaga xos tafakkur tarzining sintezlashuvini ta'kidlaydilar. Xuddi shunga oʻxshash hol Ahmad A'zamning 80-yillarda yozilgan “Asqartoʻgʻ tomonlarda” qissasida ham kuzatiladi. Nazarimizda, Ahmad A'zamning keyingi davr ijodida bu ikki hodisa sintezlashishdan koʻra koʻproq ayrim-ayrim asarlar butunligida alohida holda namoyon boʻlmoqda. Xususan, yozuvchining yangi “Hali hayot bor...” nomli kitobiga kiritilgan qissa va hikoyalarida, asosan, latifaga xos tafakkur ustuvor (Ahmad A'zam. Hali hayot bor. – Toshkent, “Oʻzbekiston”, 2011).

“Hali hayot bor...” qissasi syujetiga oddiygina voqea asos qilib olingan: nashriyotda ishlaydigan bir yigitni yuqori tashkilotdan yoʻqlab qolishadi... Aslida, bu voqea, yaxlit qaraganda, oddiygina bir latifadek, turmushda yuz berib turadigan va keyincha eslab kulib yuriladigan holatlardan biri, xolos. Lekin yozuvchi nigohi shu oddiy voqea zamirida san'atkor e'tiboriga molik, sizni biz uchun ahamiyatli mohiyatni ilgʻab oladi. Zero, oddiygina YOʻQLOV butun bir nashriyotning bezovtaligiga sabab boʻladiki, shu asnoda odamlar orasidagi har kunlik maromida ketayotgan munosabatlar ham bir qalqib, yana joyiga tushadi.

Qissa “bosh qahramon hayotidagi muhim bir bosqichni atroflicha tasvirlab beradigan asar” sifatida asosan A'lam bilan boʻgʻliq. Biroq qissa A'lam haqida ekanligi – bu bir illyuziya. Asar xuddi latifalardagi kabi ikki “qavatli” – yuzadagi aldamchi qatlamdan borib, oxir-oqibat oʻquvchi ongida hangomaning asosiy qahramonlari Abduzafar aka, Turdiali, Umarov va Sojida boʻlib chiqadi. Ularning barchasi A'lam bilan boʻgʻliq mojaro tufayli qissaga kirib keladi-da, har biri alohida hangomaning qahramoni sifatida qissa butunligidan joy oladi.

Yozuvchi tasvirlanayotgan voqelikka A'lam kabi ijtimoiy-ma'naviy pozisiyadan qaraydi. Bu – muallif estetik pozisiyasining bir qirrasini. Shu bilan birga qissa butunligini belgilayotgan kulgili-kinoyaviy nuqtai nazar asarda A'lam ishtirokini kamaytirib, koʻproq boshqa qahramonlarni asar markaziga olib chiqadi. Roviyy esa kulgili-kinoyaviy pozisiyani ifodalashdagi faol sub'ekt sifatida namoyon boʻladi.

Nashriyot direktori Abduzafar akaga qoʻngiroq qilib, Kamolov A'lam haliyam unda ishlayotganmi-yoʻqmi ekanini sorashadi. Familiyasi kim-nimaligini direktor eslay olmaydigan A'lamni yuqoridan nima sabab bilan soroqlab qolishgani ma'lum boʻlgunicha oʻtgan ikki-uch soatlik vaqt ichida har ehtimolga qarshi choratadbirlarni korib qoʻyish “jarayon”i boshlanib ketadi. Oʻsha kuni uyiga koʻmir tushirib, ishga kechikkan A'lam kelgach ma'lum boʻladiki, u hech qanaqa xato qilgani yoʻq, yuqoridagilar uni bor-yoʻgi kichikroq bir mukofot, sovgʻa uchun yoʻqlatishibdi, xolos. Shundan song A'lamga aloqador “jarayon”ni toxtatish uchun

jonbozlikni boshlar ekan, Turdiali, aslini olganda, tayin bir tamani oylamaydi. Navbati bilan bosh muharrir orinbosari Umarovga, kasaba uyushmasi raisi Sojidaga, kadrlar bolimi boshligi Surayyoga vaziyatni tushuntirib chiqadi. U bu harakatlarini A'lamga yaxshilik qilish maqsadida boshlab, oxir-oqibat ozi bilib-bilmay Umarovni qarzdor qilib qoyish bilan yakunlaydi – uni xato qilishdan saqlab qoladi. Oz navbatida Umarov ham Turdiali uchun Moskvaga yo'llanmani naqd qilib qoyadi. Umuman olganda, Turdiali hamma bilan juda samimiy muomalada bo'la oladi. Hozirgina Sojidani kokka kotarib, Surayyo sizning oldingizda kim, deb turganida qanchalar samimiy bo'lsa, Surayyoga Sojida opasining gaplarini etkazayotganida ham shu qadar samimiy bo'la oladi. Yoki A'lamga qanchalar do'stona muomalada bo'lsa, A'lam va u kabilarga hecham do'st emasligini Abduzafar akaga takror va takror ta'kidlaganida ham shu qadar samimiy edi. Xullas, Turdiali juda “samimiyat” bilan, “kongildan chiqarib” ikkiyuzlamachilik qiladi, foydasi bor-yoqligidan qat'iy nazar, har bir odamni erinmay manipulyasiya qilishi mumkin. Darvoqe, hozirgi maqomida u shunday yo'l tutyapti, keyinroq, masalan, Umarovning maqomiga kotarilsa, uning ikkiyoqlama oyinlardagi mahorati yanayam ortishini bemalol bashorat qilish mumkin. Turdiali odamlar orasidagi hayotni qiyinlashtiradigan munosabatlarni deyarli his qilmaydi, ularni goyo hayotning ajralmas bir qismidek qabul qilib yashayveradi. A'lam tobora toqat qilishi qiyinlashayotgan boyoq hidi ham Turdiali uchun ozi yashayotgan hayotning muqarrar bir qismi kabi hech bir malol kelmaydi (“...sizga oxshab qiynalmayman, yashab yuribman. Yo dod solganimni kordingizmi?”). Avvaliga roviy tomonidan shunchaki yo'lga aytib otilgandek ko'ringan boyoq hidi haqidagi gaplar voqealar davomida bora-bora odamlarning ishlashiga, yashashiga halal berayotgan sharoitning, munosabatlarning moddiylashgan bir korinishi kabi taassurot qoldiradi.

Hovlidagi boyoq hidi kirmasligi uchun har bir tirqishni erinmay berkitib chiqqan Surayyo kim-qanaqa odamlar bilan, qanday munosabatlar ichida ishlayotgan, yashayotganiga qaramay, hayotga, odamlarga munosabatda samimiyatni saqlab qolishga intiladi. Hatto boyoq hidini deyarli sezmaslikka organgan Turdiali ham Surayyyoning xonasidagi havo qanaqadir tozaroq, boyoq hididan holi ekanini sezadi. Galati paradoks: Turdiali boyoq hidini sezmaydi, lekin uning yoqligini darrov sezadi. Nazarimizda, boyoq hidi yoqligini me'yordan tashqari holatdek qabul qilgani singari, unga o'zining ikkiyuzlamachiligi ham me'yor, A'lamning hamma narsaga to'g'ri ko'z bilan qarashi esa me'yorga sigmaydigan holat bo'lib tuyuladi.

A'lam aynan Sojidaning xonasida boyoqning toqat qilib bo'lmaydigan zahrini his qiladi. Ayni paytda Sojidaning fe'l-atvoridagi kishi toqat qilolmaydigan maydakashlik, oddiy haqiqatlarni anglamaslik kabilarni kuzatib, unga birinchi marta korib turgan narsasiga qaragandek hayron bo'lib tikiladi. Uning hayronligida gap bor – u kimdir organib qolgan, kimdir tabiiy deb qaragan, yana kimdir indamaygina toqat qilayotgan narsalarga boshqa ko'z bilan, boshqa nigoh bilan

qaraydi. A'lamdagi ana shu “boshqacha” nigoh uni o'z hayotining hech bir keraksiz muomala-munosabatlar bilan zaharlanishiga yo'l qoymaslikka undaydi.

A'lam boyoq hidi anqigan havodan o'pkasi teshilib nafas olmaslik uchun, ehtimolki, kelajakdagi hayotini asabni egovlaydigan, asosiy ishidan, ijoddan chalgitadigan, hech zarurati yo'q muomala-munosabatlarga qurbon qilmaslik uchun ishdan boshlash haqida ariza beradi. U bu ishi bilan hech kimga iddao yoki zarda qilayotgani yo'q. Yozuvchi buni A'lam hayotidagi fojeiy holat yoki dramatik vaziyat sifatida talqin qilmaydi. Abduzafar aka bilan, umuman nashriyotdagilar bilan A'lam ortasida jiddiyroq toqnashuv, tortishuv ham ro'y bermaydi. Shuning uchun ham uning ishdan boshlashiga sabab topolmay bosh qotirishadi. Nima bo'lganda ham, A'lam uchun oldinda hali hayot bor, u o'zligiga muvofiq yashash uchun sharoit, ijod qilish uchun imkon axtaradi. Nashriyot esa A'lam misolida yangi nafas bo'lishi mumkin bo'lgan odamdan, ehtimolki, kelajagidan – erkinroq, insoniyroq, tabiiyroq hayotidan ayriladi. Ishdan ketgan A'lamning emas, A'lamsiz qolayotgan nashriyotning yutqiziği koproqdek. Har holda, yozuvchi qissa markaziga qoyilgan muammoni A'lamning dramasi sifatida emas, nashriyotdagilar haqidagi latifa sifatida taqdim qilgani asar oxiriga borib yanada ochiqroq ma'lum bo'ladi. Asar Abduzafar akaning ichida o'zicha A'lamga havas qilish sahnasi bilan yakunlanishi bejiz emas: “Maza-ya shularniki, xohlasa ishlaydi, xohlamasa – yo'q. Bemalol boshab ketaveradi. Yuqoridan ruxsat ham sorab otirmaydi! Ushlab turadigan hech narsasi yo'q”. Direktorligini dolonda ohista xushtak chalib yurib, xodimlarning kirgan-chiqqanini, ish bilan qay darajada bandligini tekshirib yurishdan iborat deb biladigan, ishlash (yashash) nimaligini aslida umuman bilmaydigan, boshqalarning ham ishlashiga (yashashiga) halaqit berayotganidan bexabar Abduzafar aka uchun A'lamdagi boshqacha fikrlashning o'ziyoq yumshoqroq tegadigan, o'zidan mamnunlik uyqusidan uygotib yuboradigan tarsakidek gap. Unda g'ira-shira bo'lsa-da, o'zidan kongli to'lmaslik hissi paydo bo'ladi. Shu sabab har doimgi hamma narsadan mamnun odamning xushtagi bu safar uning o'ziga shunchaki vishillash bo'lib eshitiladi...

A.Kamyuning “Vabo” romanini tarjima qilish hamda “Ozlik” turkum korsatuvlari yozuvchi uchun qay bir darajada otmishni rivoyatga xos tafakkur tarzi orqali idrok etish vositasi bo'ldi, deyish mumkin. “Ozlik” – qatagonga uchragan kishilarning o'lmagan umidi, sinmagan sabri haqidagi jiddiy suhbatlardan iborat korsatuv. “Qatagon yili” hikoyasida esa, aksincha, otmish davr tuzumi latifanamo bir yosinda tasvirlanadi. Hikoyadagi bekatda bo'lib o'tgan mojaro bir qarashda ota arzimasdek korinadi. Biroq tazyiqu bosimlar sharoitida yashayotgan kishilarning xatti-harakatlari, muomala-munosabatlari beixtiyor kulgi uygotish bilan birga, vaziyatga qarab qanday rol oynashidan qat'iy nazar, baribir, inson har qanday sharoitda ham insoniyligini u yoki bu shaklda namoyon qilishga (melisa yigit), inson sifatida, shaxs sifatidagi o'z chegaralarini o'zicha himoya qilishga (hikoyachi, Said bovo) urinishi haqidagi xulosaga olib keladi.

Ahmad A'zam o'z qahramonlarini odatdan tashqari vaziyatlarda sinashni yaxshi koradi. Bu ham qahramonlarning afandinamo odatu tasavvurlari, xatti-harakatlarini

tasvirlash uchun qulay usul. Bu borada “Soyasini yoʻqotgan odam”, “Mastirjamiyat”, “Notoʻgʻri tush” va yuqorida tilga olingan “Qataʻon yili” hikoyalari alohida orin tutadi.

Nihoyat, yozuvchi asarlaridagi roviy, hikoyachi-qahramon haqida. Odatda mahoratli yozuvchilarning asarlarida hikoya qilinayotgan voqeagina emas, “hikoya qilish hodisasi” (M.M.Baxtin) ham ahamiyatga ega boʻladi – muhim estetik funktsiya bajaradi. Ahmad A'zam voqeani hikoya qilishning hadisini olgan, bu borada oʻziga xos uslubga ega yozuvchi. Adib asarlaridagi roviy koʻpincha sizni bizga oʻxshagan oddiy odam, barchamiz kabi u ham insoniy zaifliklardan, kamchiliklardan holi emas. U goyo kechagina uyda, koʻchada, ishxonada boʻlgan hangomani xuddi oshnasiga aytib berayotgandek hikoya qiladi, beixtiyor uning zavqi sizga ham yuqadi. Yozuvchi asarlarida latifa, hangomadagi kabi sahnaviylikning, koʻrib-kuzatib idrok etishga asoslangan tasvir uslubining etakchiligi bois roviy koʻpincha tomoshabin – u qiziq, kulgili voqeani tomosha qiladi, u orqali biz ham tomosha qilamiz. Ba'zan roviy hikoyachi-qahramon sifatida boshqalarga qoʻshib oʻziniyam tomosha qiladi, u ham hangomaning ishtirokchilaridan biri boʻlib qoladi. Biroq ayni paytda roviy ana shu hangoma zamiridagi, bir qarashda ota jon, arzimas koʻringan hodisalar mohiyatidagi jiddiy tomonlarga diqqatni tortadi. Bir vaqtning oʻzida asardan ikki xil taassurot qoladi – bir tomondan miriqib kulasan-da, ikkinchi tomondan ilgari shunchaki e'tibor bermagan narsalarning haqida jiddiy oylab koʻrish zaruratini his qila boshlaysan kishi.

On marta eshitgandan bir bora koʻrgan afzal, deyishadi. Yozuvchi asarlari haqidagi gaplarni shu erda toxtatib, yaxshi kitobni didli kitobxonlarga ilingan holda, undagi latifalar zamirida botin inson tabiati haqidagi teran mushohadalarni baham koʻrishga chaqirib qolamiz.

Mashhura Seralieva,
Andijon davlat universiteti tadqiqotchisi
"Oʻzbekiston adabiyoti va san'ati" 2012 yil 24 avgust